



Inuusuttut suliffissaaleqinerat qanoq iliuuseqarfigineqarnera qanorlu akiorniarneqarnera pillugu apeqquteqaat aallaavigalugu oqallisissiaq.

(Inuit Ataqtigiit Inatsisartunut ilaasortaataat)

Inuit Ataqtigiit Inatsisartunut ilaasortaataasa apeqquteqaat aallaavigalugu oqallisissiaat tassalu inuusuttut suliffissaaleqinerat qanoq iliuuseqarfigineqarnera qanorlu akiorniarneqarnera tamannalu Partii Naleqqamiit oqaaseqarfigissavarput.

Nunatsinni suliffissaaleqineq tamatsinnut ilungersunartorsiortitsivoq, inuusuttuinnaanngillat aammali ilaqarput aalisarnikkut piniarnikkullu inuussutissarsiorsinnaagaluartut taakkualu mattussorpagut inuiaqtigiinnut tamanut sunniuttumik, pingaartumillu nunaqarfinni illoqarfinnilu inuusuttorpasuit eqqorneqarsimallutik, taamatullu ingerlasoqaannassappat suliffissaaleqisut inuusuttortagut eqqarsaatigalugit siunissamut inuiaqtigiinnut sunniuteqartussaavoq artornarlunnartumik.

Suliffissaaleqineq nunatsinni annertusiartuinnassanngippat siunissami ilinniartitaanikkut sunniutilimmik nukittorsaanissaq ingerlattuartariaqarpoq, tassami ilinniarsimassuseq qaffasinneruppat suliffissaaleqineq minnerulertussaasoq tamatta ilisimalluarparparput.

Kommunit Namminersorlutik oqartussat inuiaqtigiinnilu suliffeqarfiit tamarmik akisussaaffimmik tiguseqataasariaqalersut Partii Naleqqamit piumasaralugu oqaatiginiarparput.

Namminersorlutik oqartussat suliffeqarfiutaat tamarmik inuusuttut suliffissaqarnissaannut akisussaaffimmik tiguseqatanissaat piumasaqaatinngortariaqarpoq. Royal Greenland ilaatigut kusanartumik sulisumik meeraannut suliniuteqarpoq, tassalu inuusuttuaqqat efterskolertarnerannut akiliussisarnera ajunngilluinnartoq soorunami tamanna qujassutigisariaqartoq Partii Naleqqamiit oqaatigerusupparput.

Suliffeqarfiit allat aamma ilinniartitaanermut annerusumik akisussaaffimmik tigusinissaat kammattuutigisariaqarparput, Namminersorlutik oqartussaaf ilinniartitaanermut sulii annerusumik aningaasaliinissaat ilungersuttariaqarpoq pingaartumik inuusuttut suliffissaaleqisut eqqarsaatigalugit.

Piarersarfiit suliniutaat ajunngilaq, kisianni taanna kisiat tuppallersaatigissanngilarput tassami tamarmik inuusuttut suliffissaaleqisut ilinniarnissaminnut angusaminnik qaffassaasut piareersarfinni inissaqanngillat, ilaallu immikkorluinnaq aaqqissuussiffigineqartariaqarput pingaartumik ininik atuartsiffiusinnaasunik amigaatillit eqqarsaatigalugit.

Kommunit inuusuttunik inersimasunillu suliffissaaleqisunik sullissinerat aamma annertusagassaavoq, ajoraluartumik inuttut nukittorsagassaasugut amerlagatta inuiaqatigiillu ingerlalluarnarulissagutta sulineranut tamakkiisumik piginnaanngorsarnissarput tamakkiuttariaqaleratsigu.

Inuusuttagut tamarmik toqqaannartumik ilinniartinnut isersisinnaanngitsut amerlasuujusut takusinnaavarput tassami suliffissaaleqisorpassuit tamanna uppersarsarpaat. Tamakkulu nukissaqarnerullutik ingerlariaqqissappata inuusuttunik sullissiviit atornerarnerat annertusartariaqarpoq.

Assersuutigalugu inuusuttunik piginnaanngorsaallutik sullissilluartartunut Timi Asimikkut atorneraqqqittariaqalerput, tassami iluemoorsinnaanngilaq suliffissaaleqisut inuusuttut amerlalluinnaraluartut Timi Asimikkut massakkut atorneraratik uninngaannarput atorumaneqannginnamik.

Uffalu inuusuttunik sullissinermi misilittagaqarlualuartut, aammalu uppersaatalimmik inuusuttutnut pitsaasunik alloriartitsisartut atorumaneqannginnerat tupinnartorujussuuvoq, piaartumillu Timi Asimikkut atorneralernissaa kissaatigaarput, tassami inuttut ineriartorneq ingerlalluaraangat inuusuttut ingerlariaqqinnissaminnut nukissaqarnerulertarmata.

Isorliunerusuni najugallit nunaqarfinnilu tamarmik piareersarfinni inissaqanngillat, atuartut ineqarfigisinnaasaat amigaatigineqarput tamannalu pissutigalugu aamma immikkut suliniarfigineqarnissaat pinngitsoorneqarsinnaanngilaq.

Immikkut aaqqissuussinikkut suliffissaqartinneqarnissaat inuttullu ineriartornissamut nunaqarfinni illoqarfinnilu najugallit sulisinneqarsinnaanerit kommunit Namminersorlutik oqartussat

suliffeqarfiillu ataatsimut akileqatigiillutik ingerlatsinissaat piaartumik aallartinneqassasoq kissaatigaarput suliffissaaleqisummi amerlavallaarujussuarput tamannalu akuersaaginnarsinnaajunnaarparput.

Kiisalu ilanngullugu eqqarsaatissatut apuukkusupparput immikkut suliffissaqartitsiniarluni aaqqissuussisarnerit pinngitsoorneqarsinnaanngimmata qangatut aaqqissuussinerit Mandtimit eqqunneqarnissaat eqqarsaatigineqartariaqarpoq.

Aammalu avataaniit suliartortartut killiliiffigineqarnissaat sakkortuumik piumasaraarput, tassami ilumoorsinnaanngilaq ilinniarsimanngitsut amerlasuut tikerartinneqartarnerat maani suliffissaaleqineq taamak annertutigisoq.

Kiisalu nunatsinni nunaqavissut aatsitassarsiornikkut namminneq ineriartorusuttut piaarnerusumik aaqutissiunnissaat Partii Naleqqamiit kissaatigaarput. Tassami piumassuseqarlutik suliffinnik pilersitserusukkaluartut massakkumut noqippagut, akerlianilli nunaqavissunngitsunut periarfissat ammanerujussuullutik soorunami tamanna anguniakkatsinnut naapertuutinngilaq.